

<><><><><><>

CM FICCI

मुख्यमंत्री ओमर अब्दुल्ला होरें आखेआ ऐ जे एह सरकार ते सैलसफा कन्नै जुड़े दे सभ्मनें सरबंधत धड़ें दी सांझी जिम्मेदारी बनदी ऐ जे ओह जम्मू-कश्मीर गी इक बारी फही देसै दी सभ्मनें शा बधिया सैलसफा थाहर दे तौर पर स्थापित करन ते कन्नै इस गल्लै गी बी जकीनी बनान जे प्रदेश दी एह थाहर लगातार बरकरार रवै। मुख्यमंत्री होर कल श्रीनगर दे शोरे कश्मीर अंतर्राष्ट्री कन्वेंशन सेंटर — **SKICC** च आयोजित इक बशेश कार्यक्रमै दरान बोला करदे हे। जम्मू-कश्मीर च सैलसफा खेत्तर च परतियै जान भरने सरबंधी गल्लबात आहले इस कार्यक्रम दा आयोजन फिक्की ते जम्मू-कश्मीर दे सैलसफा मैहकमे आसेआ सांझे तौर पर कीता गेदा हा। इस मौके अपने भाशण च मुख्यमंत्री होरें आखेआ जे उं'दी सरकार, सैलानिएं दे तजुर्बे गी होर बेहतर बनाने पर केन्द्रित नमीं पैहलकदमिएं पर कम्म करै करदी ऐ। हाल दिएं चुनौतिएं बारै बोलदे होई ओमर होरें 22 अप्रैल शा पैहले आहली स्थिति ते ओहदे मगरा बने दे हालात पर बी लोऽ पाई ते आखेआ जे पहलगाम आतंकी हमला बड़ा मंदे भागें आहला हा ते एहदे परैन्त सैलानिएं दी आमद च चानचक्क गै बड़ी मती कमी दर्ज कीती गई।

<><><><><><>

Court of Arbitration

भारत नै जम्मू-कश्मीर च किशनगंगा ते रातले पनबिजली परियोजनाएं पर तथाकथित मध्यस्थता अदालतै दे फैसले गी खारज करी दित्ता ऐ। मंत्रालय नै आखेआ ऐ जे भारत नै इस मध्यस्थता अदालत दी कनूनी वैधता गी कदें बी मान्यता नेई दित्ती ऐ ते एहदा गठन सिंधु जल संधि दी गंभीर उल्लंघना ऐ। मंत्रालय नै आखेआ ऐ जे पहलगाम आतंकी हमले दे बाद भारत नै सिंधु जल-संधि गी स्थगित करी दित्ता ते भारत हून संधि तैहत कोई बी जिम्मेदारी निभाने लेई मजबूर नेई ऐ। एह फैसला बन्ने-पारा आहले आतंकवाद गी पाकिस्तान दे समर्थन दे मद्देनजर लैता गेआ हा। मंत्रालय नै आखेआ जे कुसै बी मध्यस्थता अदालतै गी भारत दे इस फैसले पर सोआल पुट्टने दा हक नेई ऐ। बदेश मंत्रालय नै आखेआ ऐ जे एह फैसला पाकिस्तान दे इशारे पर लैता गेआ ऐ ते एह आतंकवाद दे वैश्विक केंद्र दे रूपै च पाकिस्तान दी भूमिका थमां ध्यान हटाने दी कोशिश ऐ।

<><><><><><>

CS Highway Projects

मुख्य सचिव अटल डुल्लु होरें जम्मू-कश्मीर दे बक्ख-बक्ख हिस्सें च तोढ़ चाढ़े जा'रदे राष्ट्री जरनैली सिड्कें सरबंधी प्रोजेक्टें दे कम्मै च हासल प्रगति दा जायजा लैने लेई कल इक बैठक दी प्रधानता कीती। इस मौके पर उ'नें सरबंधत डिप्टी कमिशनरें पर जोर पाया जे ओह ऐकड़े प्रोजेक्टें लेई जिमीं हासल करने ते खान्नां कड्डने मतल्लक होरनें मामलें बक्खी चेचा ध्यान देन तांजे इस गल्लै गी जकीनी बनाया जा जे इ'नें कम्में च कुसै किस्मै दी कोई रुकावट पेश नेई आवै। बैठक दरान बक्ख-बक्ख एजेंसिएं आसेआ तोढ़ चाढ़ी जा'रदी महत्वपूर्ण परियोजनाएं च हासल प्रगति पर बी लोऽ पाई गई। बैठका दरान जेहड़ी बड्डी

परियोजनाएं दा जायजा लैता गेआ उंदे च दिल्ली-अमृतसर-कटरा एक्सप्रेस-वे ते जम्मू रिंग रोड पर सुरंगें दे निर्माण सरबंधी प्रोजेक्ट शामिल न। मुख्य सचिवें होरें सरबंधत एजेंसिएं गी निर्देश दित्ता जे ओह इनें महत्वपूर्ण कम्में गी 31 मार्च 2026 तगर सबूरा करोआना जकीनी बनान। एहदे अलावा मुख्य सचिव होरें जम्मू-श्रीनगर राष्ट्रीय जर्नली सिडक सरबंधी परियोजनाएं दा बी जायजा लैता जिंदे च मरोग थमां डिगडोल तगर सुरंग, डिगडोल थमां खूनी नाले तोहड़ी दे हिस्से दा निर्माण ते मकरकोट थमां शेरबीबी इलाके तोहड़ी बक्ख-बक्ख निर्माण कम्म शामिल न।

<><><><><><>

House Committee Salaries

विधायके दी तनखाह ते भत्ते च बाद्धा करने दी मंग दी जांच लेई बनाई गेदी सदन कमेटी नै कल श्रीनगर दे विधानसभा परिसर च इक बैठक सददी। इस बैठक दी अध्यक्षता कमेटी दे चेयरमैन सुरजीत सिंह सलाथिया होरें कीती। इस बैठक च अली मोहम्मद सागर, जी.ए.मीर, सज्जाद लोन, हसनेन मसूदी, पीरजादा फारुक, अहमद शाह, अर्जुन सिंह राजू ते मुजफ्फर इकबाल खान सनें होर सदस्ये बी हिस्सा लेआ। बैठक दरान अध्यक्ष होरें विधायके, साबका विधायके ते सहायके दी तनखाह ते भत्ते च बाद्धा करने दी मंग गी सुनेआ ते इस मामले उप्पर सकारात्मक बचार करने दा भरोसा दोआया। उनें दस्सेआ जे अगले सत्र शा पैहले इक व्यापक रिपोर्ट विधानसभा गी सौंपी जाग।

<><><><><><>

Op Sindhu

ऑपरेशन सिंधु दे तैहत अजे तगर कुल 4 ज्हार 415 भारती नागरिकें गी पच्छिम एशिया च बने दे हालात दी वजह कन्ने ईरान ते इजराइल थमां सुरक्षत बाहर कड्डेआ गेआ ऐ। एहदे च ईरान थमां 3 ज्हार 597 ते इजराइल थमां 818 लोक शामिल न। जिनें गी खास डोआरिएं राएं सुरक्षत बाहर कड्डेआ गेआ ऐ। विदेश मंत्रालय आस्सेआजारी इक ब्यान मूजब 14 ओसीआई कार्ड धारक, 9 नेपाली नागरिक, 4 श्रीलंकाई नागरिक ते 1 भारतीय नागरिक दी ईरानी घरै आली गी बी सुरक्षत बाहर कड्डेआ गेआ ऐ।

<><><><><><>

PM-MKB

प्रधानमंत्री नरेन्द्र मोदी होर कल ऐतवारें 29 जून गी म्हीने च इक बारी प्रसारत होने आले अपने रेडियो कार्यक्रम “मन की बात” राएं देश विदेश च रौहने आले लोकें कन्ने अपने बचार सांझे करगन। एह इस कार्यक्रम दी 123मीं किश्त होग। मन की बात दा प्रसारण आकाशवाणी ते दूरदर्शन दी समूलचे नेटवर्क दे अलावा ए.आई.आर न्यूज वेबसाइट ते न्यूज ऑन ए.आई.आर मोबाइल ऐप ते डीडी न्यूज, आकाशवाणी न्यूज प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनल पर बी कीता जाग। आकाशवाणी जम्मू पर मन की बात दे तैहत मगरा एहदा डोगरी च अनुवाद प्रसारत होग जिसी तुस रातीं 8 बजे इक बारी परतियै सुनी सकदे ओ। आकाशवाणी दा क्षेत्रीय समाचार एकांश जम्मू कल रातीं साढ़े 10 बजे मन की बात पर इक परिचर्चा बी प्रसारत करोग।

<><><><><><>